

八瓊室金石補正

第五六册

八瓊室金石補正卷一百十九

太倉陸增祥撰

男

繼輝校錄

吳興劉承幹覆校

宋三十八

重修黔陽縣治記

高四尺六寸五分廣二尺三寸八分廿二行行卅九
字字徑六分正書篆額五行行二字題云沅州黔陽
縣重修縣治記字長
徑三寸在沅州府學

縣吏之長曰令令長之治曰寺所以宣德意字吾民初
無小大遐邇之間也黔陽秦黔中郡唐天寶初更名黔
江五季叛亂不入版圖 國朝熙寧閒五溪蠻平復置

隸沅州官寺草創規模隘陋爲令者視爲荒僻之邦類
不屑意然山川之傑特土壤之沃美物植之滋茂率頡
頽湖左諸邑况風俗樸靜人士秀發陶染王化垂百五
十餘年是亦中州清淑之氣所旁薄者詎可以蠻荆舊
習鄙夷之哉寶慶元年春昭武饒侯敏學來以學而爲政
因俗以行化民旣安之環睨治所聽宇墮落榱楹腐敗
左支右撐達于門廡乃喟然曰地雖褊百里號令之所
從出誠若是過者生惕於勢詘矣其何以見吏民邪前
乎此者項背相望豈憚於改作而不屑於爲與抑拘於
用嗇而不足於爲與何朝斯夕斯而邈未之顧也或謂

裨謚謀野而獲宓氏彈琴而治令長之政有在此而不
在彼者吁民社重寄苟借是以自解則怠忽之念萌吾
所恃以振起紀綱者皆弛懈弗立矣尙孰從而論政哉
居數月歲豐人和公家事簡究見利病嚶工憲材成謀
自我或仍其舊或撤而新鼓樓峻整門閤深嚴修廊繩
直易茨以瓦有庫有廩吏舍獄戶各有其所高明爽塏
一旦改觀闢東西爲兩燕室榜以雙絕絃歌侯復念惟
社有壇壝學有宮室風化所關邑之先務社委郊關之
外無尺椽庇風雨即邑治東置壇設主仍作齋聽以奉
祀事學雖屹立祠廟僅存自講堂齋廡至櫺星悉力經

營以厲士氣蓋侯平易近民是役之興用其餘力豪髮無擾竹木材石無不樂與官爲市者乃鳩餘材荆寶山道院爲士夫往來惓息之所復立盍簪澄練兩亭爲迎送之地至於境內郵傳祠宇悉更新之街衢亦甃以石縣圃榛翳已久鉏薙而疏理之芟製有亭通村有徑松莊有廬卉木之嘉泉石之勝胷中邱壑隨所高下而區以別松莊之後又建社倉列規畫備先曷大抵不專爲遊觀設也閱明年冬潰成暇日與賓寮登覽其上顧而謂之費不侈力不勞而功緒汔濟者固非彊人以所不欲而遂我之所必欲向若疑沮於或者之說不過補苴

罅漏翫愒歲月委之而去他奚暇恤焉雖然天下之事
不患於難成而患於志之不立志立矣又病於學之不
充學貴於有用仕以行其學古之人所以能大其官者
學優而仕侯學承于家仕方再調有志立事事立而人
不知一轉移之無廢不舉不待家撫戶曉俾民知所趨
嚮是豈膠轄簿書期會者可與同日而語也邑人謁記
不復辭因以發侯之志云耳紹定改元夏五迪功郎沅
州州學教授東嘉翁永年記鄉貢進士單銓書

右黔陽縣重脩縣治記碑翁永年撰單銓書正書廿
二行行三十九字篆額五行行二字在沅州府學明

倫堂庭東壁間

古泉山館
金石文編

案一統志饒敏學昭武人朱子弟子寶慶元年知

黔陽縣嘗脩縣治廣學宮建寶山書院士子始知
向學据碑文則是寶山道院非書院也文敘饒侯
百廢具舉而篆額獨以縣治為主統於所先耳單
銓黔陽人寶慶二年王會龍榜進士嘗為本邑教
諭見湖南通志選舉

嘉定縣學記

高四尺八寸廣二尺七寸廿二行行三十七字字徑
七分額三行題嘉定縣學之記六字字徑三寸七分
均正書
在嘉定

士生斯世抱負豪偉絕特之資固有不待文王而興者
至於中人之性蕩濇易流雖曰秉彝好德亦必因物有
遷苟無詩書以爲砭劑無禮義以爲繩墨則頑愚鄙野
老死奧溲沒沒與草木俱腐自古及今何可勝數使遇
眞儒碩德以爲師友則漸摩誘掖開導激昂誦說乎六
經百氏之書究明乎三綱五常之道涵茹今古嚙齶道
眞學足以充其資才足以伸乎世一旦舒翹揚英展采
錯事建大勲業立大名節澤流四海事光千載不亦偉
歟今焉身爲幸民地鄰京國耳接鐘鼓笙鏞之音目見
黼黻文章之盛名師益友講道授業者代不乏人然則

爾士非學而奚務

朝家

列聖相承右文尊儒度越前古車書萬里聲教四達至
於要荒蜚蠻之域悉置學官以資教養口歟盛哉吳會
今股肱郡嘉定爲邑實崑山之東境地連江海炊煙孤
迥往年蒲葦間故多盜田口爲之繹騷豪大家或怙貲
馮疆輕犯法窶弱益困豈教之未至歟嘉定十一年邑
始創實令尹高侯衍孫基之其明年春三月營學宮乃
度地於邑之南面勢軒豁規摹顯煥士民翕然越二載
當十四年申冬落成殿堂門廡高壯華好廟貌祭器齋

舍庖溷罔不具備於是父兄詔其子弟負笈抱經相驩以趨廼立弟子貢有庾廩以充其食有課試以較其藝彬彬乎鄒魯之風矣學成迨今十有一載而未有記邑士以爲請璞淺陋不學不知爲文然惜前人經始之勤久而未彰不敢固辭夫吳會之地非延州來季子之故國邪禮樂之遺風猶在茲邑析于崑山崑山衣紵之富爲吳最其間佐鈞衡秉節麾者項背相望是邑同一封畛同一風氣爾士其毋自棄暴務修潔□習以求合於儒有司勿鄙夷其民務尊吾道使沉澣涵泳期用於世異時來學之士將有躡魁躔躋顯仕以光耀其里閭者

豈若鄭鄉校徒議其執政而□哉嗚呼高侯奉

天子命以作新于茲邑固職也然畢力單慮事不可以
泯沒相其役者三士曰陳一鳴何夢龍□力問學厲操
行方以身爲邑士倡凡程工度材實尸其勞故併書之
使刻于石紹定二年中秋□宣教郎知平江府嘉定縣
主管勸農公事兼鹽場兵馬監押弓手寨兵軍正沈璞
謹記并書□事郎平江府嘉定縣尉巡捉私茶鹽礬兼
催綱史案題額建學直學潘剛中立石

吳門張允□□院子張□

右嘉定縣學記宣教郎知平江府嘉定縣主管勸農

公事兼鹽場兵馬監押弓手寨兵軍正沈璞記并書
先是嘉定十二年知縣高衍孫勗立學宮落成十餘
年璞始爲文記之其文有云異時來學之士將有躡
魁躔躋顯仕以光耀其里閭者豈若鄭鄉校徒議其
執政而已哉予嘗誦其言而疑之夫縣之有學將使
人士通經學古致力于聖賢之道以淑其身也立德
立功立言皆吾儒分內之事舍此而以巍科臚仕誇
耀里閭有志者羞稱之先正黃蘊生先生成進士與
其弟書謂傳臚弟一人觀者莫不稱羨士不爲千百
年中一人而爲三年中一人識趣卑陋已甚蘊生之

識勝於璞遠矣禮居是邑不非其大夫士君子忠厚之道固然身為長吏正當采輿論以鑑已得失若之何惡之政而無失何恤乎人言若其有失安能禁人之議堯設謫木而聖周任衛巫而亡人主不可監謫區區令長而惡人之多言可乎一言以為不知此之

謂夫

潛研堂跋尾

嘉定縣學記紹定二年中秋沈璞記并正書首尾廿

二行行卅七字字徑寸許在縣學為嘉定建縣第一

碑文載縣志多竄改處錢氏跋尾載之

吳郡金石目

壬申春錢叔魯

元涪

來湘以嘉定諸刻見貽凡七

種此其最前者

無上宮主訪蔣暉詩

廣二尺三寸五分兩截上截高二尺七寸五行行字
不一字徑三寸五六分草書下截高八寸廿四行行

九字字徑五分
許正書在祁陽

讌罷高歌海上山月瓢承露浴金丹夜涼鶴透秋雲碧

萬里西風一劍寒

無上宮主訪蔣暉

以上上截

永州之祁西北六十里烏符山者暉先世別業于其下

比歲捐家帑建玉虛上真之宮三年有成紹步己丑中

秋後十日庚申有稱宮先生者青巾黃服神彩飄爽過

門謂暉曰佳山水也遂相携登殿復云可取針石當為

鑒之乃歸呼茶取石登山恍然莫知其所往但見壁間
翰墨光潤鮮悅照人深以爲訝識者乃云 純陽妙通
真人呂公自言回先生亦云無心昌老昌字無其心卽
呂字也今謂無上宮主宮字無其上亦呂字也所到有
仙跡多矣非 真人其誰耶暉默而思之千一之遇敬
臨仙筆刊之翠琰敢不自勉也哉清逸子蔣暉頓首稽
首謹書

無上宮主訪蔣暉詩并記作兩截上刻詩草書四行
下刻記正書廿四行在祁陽縣北六十里官道之左
乃紹定中蔣暉記遇呂仙贈詩事暉記云稱宮先生

又曰呂公自言同先生亦云無心昌老昌老無其心
卽呂字今謂無上宮主宮字無其上亦呂字也攷宋
人東軒筆錄載滕宗諒守巴陵有華州呂道士上謁
風骨聳秀滕知其異人口占以贈之曰華州同道士
來到岳陽城別我遊何處秋空一劍橫回聞之憮然
大笑而別則華州回道士云云一詩乃宗諒賦贈呂
仙者今全唐詩采入呂詩中反其題曰贈滕宗諒誤
矣此訪蔣暉詩全唐詩題作題全州道士蔣暉壁讌
罷作醉舞月瓢作天瓢浴誤作結雲誤作空皆當以

碑爲正

古泉山館
金石文編

通志永志夜涼作夜深青巾作貝巾均誤又西北之西石刻似而字姑從志載錄之家字及黃服字均有改刻之痕

紫霞觀鎮蛟符石刻

高五尺四寸廣三尺六寸題款前二行行字不等字徑寸許正書末行字徑二寸許行書

玉虛師相元天上帝受天明命剪伐魔精鎮天寶符萬物聽令安鎮國祚保世康民錫爾鴻禧其永寶之清逸

子蔣暉題

此二行在符篆之前

符

雷部判吏白玉蟾書永州祁陽縣烏符山刻石

此行在符篆之

後下十字較小

在祁陽烏符宋逸士蔣暉以無上宮主詩與白玉蟾

書鎮蛟符同勒石至今存焉

湖南通志
祁陽縣李志

右石刻瞿氏宗氏皆未之見碑無年月据天篆山

鈴碑當是紹定二年五月同時所書據縣志知是

年八月同時所刻符篆奇詭亦道流所為也

天篆山鈴碑

高三尺七寸五分廣二尺三寸六分上截古篆五行
行八字字長徑二寸許每字旁各以正書釋之下截
十六行行十字字徑七分許正書隸額天篆山鈴四字在祁陽

古篆文不錄

江名瀟溪名浯北去自有真仙居昔人吳明達此授

烏陽符水光山色暉暉乎千古萬古奉玉虛以上篆旁

釋文

清逸居士蔣君吉甫余六年之先訪之矣比復過款因

以古篆一紙見示怪不可識徐驗細翫參以示怪道經

天書龍章鳳烝之文始可讀之夫江名瀟者此言自瀟

江而下也溪名浯者祁邑也仙居云者邑之北也山水

暉暉者吉甫名暉也烏陽符者山名烏符也茲正所以

奉

玉虛也吉甫戊寅秋有野客惠之此文今且十有二年

人莫能辨及茲宮成余乃告之己丑仲夏白玉蟾書

嘉慶辛未知縣萬在衡博采金石入志同前長沙令
甘慶增經烏符菟奇觀中得古碑鑄天篆山鈴字體
怪譎狀如鳥蹟旁有正書譯文下附解說亦奇翫也
其文云云解云云碑立庭階下與鎮蛟符碑並舊志
未之及者喜而搨之有詩載藝文

湖南通志
祁陽縣志

右天篆山鈴碑在祁陽烏符山攷一統志云烏符
山在縣北六十里縣之望山也元成宗時劉國傑
討平永盜相要地爲三屯衡曰清化永曰烏符武
岡曰白倉選衆耕屯使賊不得復爲巢穴烏符卽

此湖南通志云白玉蟾瓊山人號海瓊子博洽羣書作文未嘗起草善篆隸學道得仙術寶慶中游華容石門山寓寶慈觀與道士孫雪窗游撰寶慈觀記蔣暉烏符觀道士此文云吉甫名暉者蔣暉也戊寅是嘉定十一年己丑是紹定二年碑刻於是年八月至嘉慶十六年始搜得之其事其文皆怪誕不經黃冠者所爲耳姑錄之以廣異聞

夫子岩大壽字

字縱橫各四尺六寸正書陽文畫內有各體書九十款二行行十字字徑五分又刊石人名一行字較小均陰文在永寧百壽岩

壽

小壽字及題

榜俱不摹

知縣史渭刻于靜江古縣夫子岩紹定己丑歲吉日

桂林王□刊

右夫子岩大壽字在永寧州廣西通志山川門云
百壽岩在州東百步許舊名夫子岩宋紹定己丑
知縣史渭刻百壽於後壁今尙存俗呼壽字岩又
古蹟門云百壽岩石刻相傳廖扶家有丹砂井飲
此水者皆百歲宋紹定間知縣史渭因鑄百壽字
於石崖又金石略失載題款引名勝志云宋紹定

己丑知縣呂渭鑄百壽字於石崖卽此

褚公祠堂記

高七尺四寸二分廣一尺九寸
十四行行五十字行書在湘鄉

褚公祠堂記

唐永徽六年褚公以尚書左僕射諫立武宸妃幾爲所
殺賴長孫太尉一言以免猶坐貶潭州都督一日行縣
至湘鄉距縣治之北數百步有僧寺曰感應寺側有池
公嘗滌筆若有浮雲滃然人異之卽其地祠公歲久弗
治藩拔碑仆紹定二年邵君自信爲宰卽故堤遺址封
略而濬治焉更爲祠堂其上斷碑所勒有遠山峭崿翠

凝煙之詩又爲亭榜曰凝煙爲大門榜曰唐都替褚公
洗筆池更爲堤以環之灌木脩蔓蒙茸蔽虧漣水衡陳
鳳山對峙實爲是邦滕處書來命記成事予惟咸以無
心爲感良以不獲其身爲見蓋感於所不係感以虛也
止於所不見見以理也此人心之良感而實見也方公
之待罪長沙也梟婦之勢如燎方揚而轍跡所繇豪端
所沾民之愛也與屈潭賈井儷芳齊榮况筆非有靈也
水非有雲也卽思而成致愛而存世之相後六百餘載
尙懷乎如在也是又奚感奚見而然哉許敬宗李義府
擠善逢惡固無足言李勣何爲者亦遷延獨對故陳喪

邦之言自一忤一合升沉立判升者信乎其得志歲月
滔邁時與事逝浮雲急景何啻朝菌暮瘳而是心之昭
昭可以建諸天地質諸鬼神者億萬人而一本千百載
而一日著在史冊寓諸陳迹是非邪正瞭如日暎所謂
得者初無毫髮加益徒起穢以自臭而忠臣良士流風
所漸則雖殘碑斷碣過其下者屏營彷徨周視太息莫
敢前拜甚則尸祝而社祠之嗚呼是所謂良感而實見
者非可幸而致也敬宗旣陷忠良復專史筆變亂白黑
類非敬播之奮如謂劉泊之死褚公有力且泊予訟寃
之事義府助之而敬宗書之公之大節如此人將公之

信乎抑許李之信乎然則士大夫以萬物皆備之身而不以古人自任不以千載自期亦自遏其躬耳矣邵君金華名闕也習聞詩書之訓故爲政知所先後其必謂予言然也紹定三年庚寅三月辛丑臨邛魏了翁記并書篆至治元年辛酉九月甲戌錄之鑱於新祠

魏鶴山褚公祠堂記在湘鄉縣東門外褚公祠文十三行行五十字末題紹定三年庚寅三月辛丑臨邛魏了翁記并書篆至治元年辛酉九月甲戌錄之鑱於新祠蓋元人重刻也攷宋史魏鶴山本傳理宗卽位遷起居郎俄權尙書工部侍郎以疾辭乃以集英

殿修撰知常德府越二日爲朱端常所劾詔降三官
靖州居住紹定四年復職主管建寧府武夷山沖佑
觀則作此記時正謫居靖州日也文中云斷碑所勒
有遠山峭崿翠凝煙之詩卽天下金石志所載洗筆
池斷碑乃褚公湘潭偶題詩宋淳熙中邑宰趙必槐
得之池中者也長沙府志載此文縣治之北脫之字
而濬治焉焉作之又脫斷碑所勒一句漣水衡陳之
衡作橫感於所不係止於所不見二句於下俱有其
字轍跡所繇之繇作由豪端所沾之沾誤治升者之
升作合朝茵之茵誤茵前拜之前誤翦而社祠之脫

之字亦自過其躬耳矣無矣字詩書誤作詩禮庚寅
上多歲字惟劉泊之泊据唐書當作泊蓋翻刻之誤
也戊辰夏五子遊此祠親至碑下碑係四方其一面
刻此記其三面則刻元至治初元九月張圖南重修
褚公祠記讀其文知祠與碑俱毀壞判官彭致堯復
興修之圖南爲之記并重刻此文於前也

古泉山館
金石文編

據碑祠在縣治之北湖南通志亦云洗筆池在縣
北今祠在東門外則已非舊址矣碑云漣水衡陳
鳳山對峙攷一統志漣水在縣西百八十里源出
寶慶府邵陽縣龍山東流徑縣南入湘潭縣西南

注於湘一名湘鄉河又云東臺山在縣東十里一名鳳凰山一名望嶽峯南連華蓋下瞰漣水宋王汾東臺山詩有未必龍山勝鳳山之句知鳳山卽鳳凰山東臺之別名也碑末云錄之鑱於新祠不詳何人所錄據重脩褚公祠堂記知此記爲元人張圖南所重刻或卽張圖南所書耳碑中朝菌作朝菌當是刊刻之譌通志載此碑據義作菌與碑異矣邵自信爲湘鄉令職官志云時次失考當據碑改列於理宗朝感應寺之名通志寺觀內失載亦當據碑補之

迎福寺鍾款

圍徑高廣無考四區記入行題名廿行行字不一
字徑寸許又稜間大字四行正書陽文在瀏陽

泲州瀏陽馭郭迎福寺廼 國忌行香之所自戊申歲

鑄造洪鍾荆建鍾閣已經四十餘年辛卯春其鍾偶因

扣擊失尔自損其樓亦且頽弊夫物有無常定數然也

在持僧 祖震募緣命匠重新鑄造鵠鍾翻盖鍾閣厥

功告成用紀其實昔紹定辛卯十三月 旣望 謹誌

緣化行者師旦 師顯 祖剛

勸緣鄒光祖 以上一區

東堂師伯宗言

住騰霞山開福禪寺本師宗益

都勸緣進士柴從龍

當代住持焚修沙門祖震謹題

以上弟二區

張伯時 李世俊 柴應時 柴琮 柴球 柴

夢發 柴慶登 張一雷 謝大樞 王宗明

李伯修 劉莘 董彥達 黃良佐 謝伯嚴

張如英 高惟正 羅嗣孫 韓氏一妹 彭氏

二妹 崔宗榮 各施淨金共成勝事功歸有作

福報無窮

幹緣甲長王普勝

武節郎新權發遣象州軍州兼管內勸農事劉秘□

以上弟
三區

福建寓瀏邑嚴躍龍常攻治業童德英生活同弟

德成 男如權 姪如林 人夫朱大明

信女柳氏施□

以上弟
四區

皇帝萬歲

重臣千秋

法輪常轉

佛日長輝

右鍾在瀏陽柴家巷本寺光緒乙亥夏陳丹皆學
博爲子搜拓之寺今名迎佛音近而譌都勸緣者
進士柴從龍題名有柴姓數人今巷名柴家蓋柴
氏所居至今尚沿其稱也潭作漚匠人所爲餘亦

多俗字文云迎福寺乃國忌行香之所案宋史禮志忌曰唐初始著罷樂廢務及行香修齋之文其後又令天下上州皆準式行香天祐初始令百官詣閤奉慰宋循其制又云留守自於寺院行香仍不得在拜表之所天下州府軍監亦如之又云中興之制忌日百僚行香在外州軍亦詣寺院行香如在以日易月服制之內並依禮例權停是國忌行香始於唐而宋因之然見於金石者惟此而已

龍壽寺復田記

紹定六年七月 萃
編載卷一百五十二

篆額三行題雲蓋龍壽
禪寺復田記在南昌

法髓髓誤華作法門缺門羶行藹聞禪衲雲集缺羶行

字知教之可弘也缺教之丁歲缺丁食無以給缺無以

興歎缺興樵江缺江亦曰其理然耳缺日餐餐作

萃編缺十三字碑石未泐拓本不顯或破損耳

顧逕市井闌題字

高一尺凡八面面廣七寸上狹下寬一面二字字徑三寸一面七行行字不一字徑五分均正書在嘉定

義井

顧逕市龍王廟西居住奉

佛弟子張□謹發誠心施財收買磚灰命工砌造義井

壹口所將

功德專用追薦亡妻陶氏三四娘子洗滌穢塵早趙

淨土成就

往生者

端平二年三月 日孝夫張口謹題

嘉慶丙寅正月偕陳君詩庭秦君鑑訪得此宋井闌於南門外石塔街恐其日久損傷遂移置學宮前舊

井上十二月十日瞿中溶記此刻在義井二字之右

井凡八面一面刻義井二字字徑四寸許一面刻記七行字徑七八分記云云井舊在嘉定南門外瞿先

生中溶題識於後移置學宮吳郡金石目

石有泐處据程穉蘅所錄補注於旁

鞏嶠增修學廩記

碑左右下方皆殘損存高五尺四寸廣三尺十三行
行廿五廿六字字徑一寸二三分行書篆額四行題
鞏公增修學廩之
記在廣州府學

車□人□□□□□人而宮富而粟賦詩缺十字伯暨

子若孫頌遺愛者飯必祝人欲天從善積家慶 嘉熙

丁酉 缺 帝率彝訓命朝郎公 嶠 持常平茶鹽節斗建

丑旂鸞戾泮三城老稚 缺 余敢不以先公舊治為念龜

滌蠹剔舉刺核條教孚未幾蒞帥漕兵予 缺 拂碑陰龍

圖公所撥頃數咸在有牟利而股轉以聞乃根其逋歸

學未缺言瀋熙逮嘉熙甲子將周如公父子司南其勤

其殷得未曾有心篆缺於士以廣

朝廷育材之仁朝耶公加惠于今亦非求德於士以充

家庭繼志之缺不匱永錫爾類朝耶公得之仁孝同

源詩禮種学好串如髮記胡能缺頤民物之理於胥

中異時發身較魁夔相履眎貢闈堅刻當有光缺生從

事耶廣州州學教授合沙劉漢英撰文林耶前特差潭

州監嶽缺蓋學生貢士正錄黃應龍黃況貢士直學陳

容龜曾壽鄉等立石貢缺文煥教論陳惠孫司

膳林顯祖鄭時中監刊學諭李子鯉掌缺

書石篆蓋人姓名斷缺僅上存結銜之半下存篆蓋

二字祥案僅存蓋字餘不可悉矣鞏公名嶠鞏湘之子記所

云父子司南是也金石續編

立碑年月已缺文云嘉熙丁酉為鞏嶠提舉常平之年宜即據以編之

法基井闌題字

高六寸五分廣五寸三分三行行五字末行六字字徑一寸二分正書在揚州

皇宋嘉熙肆年庚子至節壽昌沙門法基

右井闌題字在揚州

趙孟諱雲龍風虎四字

高四尺六寸廣二尺五寸題字二行行二字字徑一尺許下方款五行行四字字徑一寸五分正書

雲龍風虎

瀉祐甲龍季春圓日立石陽羨吏隱青田趙孟諱書

右趙孟諱雲龍風虎四字未詳所在下題年月云

甲龍者瀉祐四年甲辰也圓日當是十五月圓之

日

周君錫妻鄭氏壙志

高一尺九寸廣一尺四寸五分十二行行十六字字徑八分正書在嘉定

孺人鄭氏諱妙靜吳縣武山之裔將仕郎名贊之長女

兩家同乘梓與余生同年天作之合奉事舅姑執禮不

懈平居敬謹無戲容無燕色賦性慈惠中外翕稱余丁
先君訓武鈴轄之戚在哀疚中孺人協力總幃憂泣
過度甫遂終喪未及從吉忽癸卯五月二十三日夜半
氣血暴脫而亾吁結髮七禩旣變迅倏寔數莫逃痛割
心膂子一人慶孫孺人享年三十有一日淳祐四年十
一月庚申附葬于嘉定縣守信鄉積慶庵翁姑墳塋之
後旁夫承信郎周君錫潛洩竟廼事併記歲月而納諸
壙

此宋人墓志向在城西門外地藏殿後田河側嘉慶
丙寅十二月十日瞿中溶移置學宮以永其傳因題

記此刻在石
之右方

鄭孺人壙志其夫周君錫撰文十二行行十六字字
徑七八分淳祐四年十一月正書出嘉定縣西門外
今移嵌明倫堂東壁志稱其父官訓武鈐轄宋制武
階正八品君錫自署官爲承信郎乃從八品此武階
之最小者文云祔葬嘉定縣守信鄉積慶庵翁姑墳
塋之旁舊志分縣劄言守信鄉舊名春申據此宋時
已有此名矣姑蘇志言積慶庵歸并月浦興勝教寺
在烏涇宋端平閒里人楊九捨宅建今庵寺及涇名
皆不見於縣志

吳郡金
石目

君山鐵梢款

拓本高八寸廣一尺二寸六行行四字五字字徑一寸二分正書在巴陵

淳祐伍年拾貳月吉日孟府十位鑄到鐵梢壹樣貳隻

各重壹阡斤

在君山崇聖寺凡二高三尺口寬三尺疆三足旁有

獅環識云云攷淳祐時孟珙適為荆湖安撫制使應

是珙宅所遺

湖南通志巴陵縣陳志

右鐵梢款在君山案孟珙宋史有傳是時為湖北

安撫使兼知岳鄂州弘簡錄以為京湖安撫制置

使是年移鎮江陵縣志以為荆湖安撫制使梢

即桶也今中州人猶呼桶為梢廣雅箝箝也梢之

為桶正與此同

重炎震等題名

高二尺二寸四分廣三尺
四寸七行行六字正書

三廬重炎震白道安支南榮武信王庸變資中馬東卯
以同年之契同仕此邦拉郡士楊乙來瀉祐丙午上巳

嘉定重修縣學碑銘

高五尺七寸廣二尺三寸八行行五十七字字徑
五分許正書篆額題嘉定縣重修縣學碑并銘十字
在嘉定

嘉定重修縣碑并銘

華文閣直學士中人夫提舉江州太平興國宮德安

縣開國伯食邑九百戶賜紫金魚袋王遂撰并書

朝請郎國子司業兼起居舍人兼侍講黃自然題額

乾道戊子先君吉州筮仕崑山尉奉大父敷文以行時
敷文南定湖寇北守淮楚虜爲奪氣退居金壇買書數
千卷聚子弟以學有詩□□庶勤不可纖毫累歸來使
我家中錢可謂仕教之忠矣後縣裂爲二以練溪之東
爲嘉定縣踰七十六年弟選被命典邑曰祖父舊游何
可不力載□米具糧糗自隨朝坐琴堂不夕不休訟于
公者手自裁決負於私者寬期以償月輸歲送毫髮不
私吏無所搖手行道頌之惟是縣之學自令高□□始

而養士之費纔百石鄭提舉霖繼之增百石有差士始
來學有與薦名者其後廢壞而選繼至首以縣橋厥路
不直乃命改作榜曰登龍得池元□開講周夢虎主之
陳必大申之皆給之食凡有志者會食而宿于學四經
之集來與而課試高下不輟增其小學三十人迎師以
教之縣給之帖糧□繼請尊滕廢田于提舉得畝僅及
二百米亦稱是徐知府鹿卿以田四十七畝繼之時講
堂更剏昇新寓公周君次臯首助其費□邱君斌龍震
廷瑞薛君垣王君子昭孫君繼周吳君炎共相其成如
其家事自殿及門廊屋二十三間以朱文公舊刊金壇

縣學者刻于門講堂則以袁蒙齋所書明倫堂扁示其齋取建寧學宮所以命諸齋者名之規約咸具修葺未備者一切略治計三萬四千餘緡米七十五碩未嘗有取於吏胥牙僧而從學者欣然是歲復有與薦者以遊學而與名旁郡者以上書賜第者其試入太學者二人有以詞賦與魁選咸曰登龍之效也會選弟受代與諸公言曰諸公之進德也如是此非選謹守祖父之力也亦諸公共成之耳繼治者湯公仕龍吾鄉里敏肅諸孫其不待勉而趨也無疑矣其可無以告謂遂曰兄退居邱園於世事非所及獨於邑之大務胡可無言乃卽其

事而銘之銘曰

明德自始兮制起虞庠 逮我聖朝兮化行縣鄉
伊吳有邑兮在海之旁 始置文字兮士風頓昌
帝命立學兮歌誦未皇 昔才半領兮謀不暇詳
今弟製錦兮于先有光 翼翼濟濟兮明倫設堂
有赫斯橋兮渡水之陽 俎豆莘莘兮頌詠琅琅
朝講四經兮夕以爲常 登名天府兮辟雍翱翔
諸公合力兮講習日長 令雖去此兮士胡忍忘
俾我後人兮愈大以章 益修厥修兮永□馨香

華亭繆恭刊

嘉定縣重修縣學碑并銘
淳祐中王遂撰并書黃自

然篆額在縣學

吳郡金石目

右碑不見年月首云乾道戊子先君吉州筮仕崑
山尉下云踰七十六年弟選被命典邑自乾道四
年後七十六年是淳祐三年也撰書者王遂華亭
縣學記亦其手筆立於淳祐六年此刻亦當在其
時也嘉定諸刻潛研堂金石目均載之獨不見有
此刻殆編輯之漏或爾時拓本已佚至顧逕市井
闌題字及鄭孺人壙志先生固不及見也

遺德廟加封靈德牒

高五尺一寸廣二尺四寸牒六行行廿九字
街名六行字徑寸餘正書在鄞縣宅山廟

勅慶元府鄞縣遺德廟善政侯神有功於民祭法所尊也爾在唐太和間立石堰以障洪流澤物甚廣鄞邑家賴之至今遺迹宛然是宜廟食不朽

國家褒表亦旣封侯錫號矣端平初祈眚猶闕詞以請因仍弗舉寧非闕歟特命有司俾衍休稱以示朕拳拳懷柔之意可特封善政靈德侯奉

勅如右牒到奉行

淳祐九年二月一日

太傅左丞相越國公 清之

同知樞密院事兼權叅知政事 徯

簽書樞密院事兼叅知政事 方叔

兼權給事中 鹿卿

都事 受以上

樞密使兼叅知政事 方叔此在清

兼權中書舍人 山此在鹿

兵部郎中兼右司 饒以上

吏部尚書 刑部尚書 吏部侍郎 起居舍人

在鄞縣宅山廟詳見寶慶三年加封碑此則又加靈

德二字也舊志云嘉熙閒屢旱禱之輒應狀聞賜額

天興此敕未見

兩浙金石志

宋史宰輔錄是年閏二月甲辰鄭清之自太傅右丞相兼樞密使越國公特授太師左丞相兼樞密使進封魏國公據碑則閏月甲辰以前已授左丞相史文誤刊也應繇謝方叔於八年十月兼參知政事碑與史合史不言方叔爲樞密使耳

育齋銘履齋說

高四尺八寸廣二尺五寸三分五層第二層十四行第五層十六行餘俱十八行行書字徑寸許在武岡

育齋銘

僉判折允升舊居倅廳刪定鄭公汝諧名其室曰育齋

今室非而名存刪定詩刻尚可摩挲嘉因豎碑扁其名
於所處之室探索育之旨意爲之銘焉唯人之生心均
赤子養而充之廣大純粹其養維何譬彼桐梓方其芽
蘖勿踐勿履培埴旣深其葉鞞鞞譬彼泉流涓涓自始
匯而蓄之莫測涯涘載稽易經育德在蒙養得其正聖
而有功中庸一書戒謹乎獨推其功用萬物以育廼知
天理具于一身操則君子捨則小人毫釐之差繆以干
里宜謹其趨毋入于詖道德之腴詩書之味採華食實
存我夜氣虛室曠然白斯生矣予作茲銘自省于己有
能默識樂只樂只

履齋說

余居武攸倅廳既銘育齋矣而日周旋乎履齋之內不能自己於言因探易而得其說履之爲卦乾上兌下乾者履之始事兌者履之終事人之進修力行於其始非難安行於其終爲難力者人安者天乾以健爲主兌以說爲義方其步趨宮庭循蹈規矩用心剛持念恪一善可行必勉於行一德可進必企而進朝夕亶亶曾不少怠非健不能也至於詣道德之闡入理義之奧造次於是動容皆中取之左右逢其原此心能無說乎惟健而後說故三以跛履言上九則視履考祥矣是以鑽堅仰

高瞻前忽後顏子之乾也心齋坐忘三月不違仁則是
顏子之兌也象曰君子以辨上下定民志履之功用莫
先於禮觀諸聖門請問其目視聽言動無往非禮卒能
克己而天下歸仁者惟顏子有是中庸曰或安而行之
或利而行之或勉強而行之及其成功一也學者踐履
之間苟能審所趨嚮將之以不倦則晞顏亦顏之徒矣
願與同志者事斯語

右育齋銘履齋說淳祐己酉六月朔書于讀易堂

右育齋銘履齋說同治庚午五月廿日自武岡之
上梅公舍掘得之撰書人名壽不見其姓攷理宗

朝有胡壽者爲湘陰令或卽其人文云余居武攸
倅廳疑時判武岡軍而志不載也僉判折允升志
亦不載鄭汝諧知武岡軍在淳熙中折僉判亦在
其時鄭汝諧有寶方山詩刻於石搜之未得讀是
碑知尙有育齋詩刻焉並當補入志

噴雷二大字

高二尺五寸廣四尺九寸二字字徑一尺八寸
六七分旁款前後各一行字徑二寸許均正書

噴雷

建炎己酉丞相河內李公名後百二十年□□孫曾
伯帥桂書刻諸石僧妙全識

右刻當在粵西而不見於粵西金石略漏也建炎
己酉後百二十年乃淳祐九年己酉也臨桂龍隱
巖隱山伏波巖等處均有其題名自淳祐庚戌迄
景定庚申凡五刻攷宋史本傳李曾伯以淳祐九
年知靜江府廣西經略安撫使兼廣西轉運使此
題正其初至之時也 又按明統志乳洞在興安
縣南十里洞有三上曰飛霞中曰駐雲下曰噴雷
然則此刻蓋在興安不審飛霞駐雲亦有題字否
興安有李邦彥三洞記未得拓本此所稱丞相河
內李公者卽邦彥也三洞記云其下者巉巖軒豁

嵌竇如磨鑄源泉渾深繇石磴而下依山循流之

石噴激激然雷震響溢羣谷意者蒼鱗頭角蠢縮

淵潛欲奮而不得騁因命之曰噴雷見廣西通志

金石略

集祥里井闌題字

拓本高一尺四寸六分寬八寸九分七行行廿七廿八字字徑六分在吳縣財帛司廟前大街

義泉 一面一字字徑八寸餘

□□平江府吳縣鳳凰鄉集祥里黃土塔橋南糜 都浜

□街南居住奉 三寶 弟子□□□□妻父解端甫與家

眷等□□□□□氏百九娘子享 年 □十二歲□月初

九日卯時受生於今年四月初八日辰因產後卧病

□□□□□□月十五日正寢身亡□伸資悼□□□

□□□設諸功德外□□□□□□殊財命工鮑□

朱家園□□□□□□□□地穿全義□□□□□以

便遠近將汲甘泉集此殊勲□助亡妻□□□□娘子

蕩滌□□超濟淨域者 肯瀉祐庚戌年玖月□

□□□□□ 謹題

集祥里人義泉題記瀉祐庚戌正書在布政司大街

兩面分刻 吳郡金石月

渠渡廟封崇福公告

高一尺八寸廣二尺八寸兩截敕廿五行行九字字
徑八分行書列銜十二行字徑四分正書末二行行
書字徑一寸
三分在武岡

武岡軍武岡縣管渠渡靈濟廟廣惠顯應宣靈孚祐侯

右可特封崇福公

勅武岡軍武岡縣管龍神孚濟昭澤普潤侯等神神萬
物者莫靈乎龍潤萬物者莫利乎水而有馮之以周普
變化則又超然不可測矣爾廟食湘南發響綿久或以
昭澤著或以靈濟稱若者舊前聞深山大澤之所鍾英
竒木異石之所約像雖事近恂恍怪力然水旱有禱厥
應如響藉烜潤之功登豐稔之年者屢矣神之爲神不

信而有證歟按迹稽功邦有彝報一肇公封以上之社
一崇侯秩之褒尙祇明倫協心幽贊益以衍庶民之福
可依前件奉

勅如右牒到奉行

淳祐十一年二月九日以上行書

太傅左丞相魏國公 清之

叅 知 政 事 方 叔

同知樞密院事兼叅知政事 潛

兼 給 事 中 礮

兼權直 舍人院 渤

三月十日午時都事趙受

司農少卿兼都司饒 付吏部

太傅左丞相魏國公

叅知政事

同知樞密院事兼叅知政事

吏部 尙書

吏部 侍郎 以上小正書
字徑四分

告崇福公奉 此後
缺佚

宋渠渡廟敕封神牒碑在武岡渠渡團卽靈濟廟慶

元時賜額嘉泰時封廣惠侯者也 淳祐十一年封崇

福公景定四年封崇福昭貺公咸淳五年封崇福昭

貺益靈公

寶慶府
鄧志

右渠渡廟封崇福公敕在武岡州西廿里玉屏山

据鄧氏跋語似一碑而刻敕文三道者今得拓本
此敕未全景定敕僅存年月疑碑已橫斷中缺兩
截然益靈公告別有一額又似非滙刻矣敕內所
稱龍神孚濟昭澤普潤侯者武岡之龍神廟也府
志云在城南五里古山之麓號曰昭潭天旱祈雨
立應宋賜嘉興廟額封昭潭普潤侯進封孚濟侯
此敕蓋在進封之時一封公一加封二字統於一

敕以類舉也昭澤鄧氏作昭潭誤餘詳靈濟廟額

牒跋尾

嘉定縣修學記

高四尺七寸廣二尺四寸三分廿一行行三十三字
字徑六分正書篆額三行題嘉定縣修學記六字字
長徑三寸
在嘉定

學宮以崇先聖厲後覺他公宇甯儉校庠序古有制雖
斗邑無敢不備嘉定邑學荆三紀齋可肄堂可踵殿翼
以廡可拜可趨來游者尙陋之然廩斛歲裁三百半蠹
於遙領職貢議斧藻匪易夔戊申秋始至士翕然告願
邑計窮空靡克佐費於是挾貴挾故以職貢請者謝弗

與令月有學給辭弗願得推實擲浮銖積鍾絜明年夏
作中門壯以釘鑲森以戟旆又明年夏作直廬楹二十
有八塑容漫久秋彰施之又明年春外作重門形其墻
以衛表所入坊扁曰興賢橫䟽清泚植槐于旁警設鼓
講設席祭爲設服席事視舊粗飭力所未逮猶多合數
役粟費斛五十餘緡費二萬六千餘皆國學生龔天乞
以直學董其事典計則水邱煥發張惟一先後焉方一
闕市未邑鷲於好競甚俠馭於操羸甚譎也樸之犧尊
山壘華之逢掖章甫日邁月征耳濡目染稍稍賣刀折
券而衡泌有弦誦聲捷貢版鳴園橋邇歲層見何文也

天賦地產知不於此乎祕俠者剛之惡譎者巧之僞銷
其惡使善剗其僞使真是機括安在令爲多士先士爲
四民首惟簡御煩尊士之秀選俊以勸導衆異不難壹
也惟賢詔愚迪民之農工商以信嚮兼善不啻獨也學
宮其令問政士議政一大統會之地歟然而昔闕略士
謂令奚以教今繕葺令謂士奚其業佔畢迹也雕篆技
也科級外物也士於學宮猶家然身家是孰若心家是
心無他法自主敬始常惺惺其持養活潑潑其形著是
心苟存則學宮今之沂泗楹夢非莫廟貌非像真見乎
端冕而面南夫子坐如尸時振佩而環侍諸子立如齊

時吾身卽賜於墻由於門於堂不遠伊邇乎淵之寢道
豈茫茫無下手颺哉如其朔而謂旬而課二丁而祀身
退心隨之邑人將曰青衿挑方是豈墨綬者所望瀉祐
辛亥夏五奉議郎知平江府嘉定縣主管勸農公事兼
主管鹽場兼主管運河隄岸搜捉銅錢下海出界兼兵
馬都監弓手寨兵軍正林應炎記

雲間陳晟黃晉刊

嘉定縣修學記瀉祐辛亥夏五林應炎撰正書辛亥

爲瀉祐十一年林侯在嘉定任第四年

吳郡金石目

八瓊室金石補正卷一百十九終

五不補正卷一百一十

三三
希古樓刊

八瓊室金石補正卷一百二十

太倉陸增祥撰

男 繼輝校錄

吳興劉承幹覆校

宋 三十九

復襄樊紀功銘

拓本高九尺二寸廣一丈一尺十
行行九字字徑九寸正書在襄陽

大宋淳祐十一年四月二十有七日京湖制置使李曾

伯奉天子命調都統高達幕府王登提兵復襄樊兩城

越三年正月元日銘于峴其銘曰

壯哉峴 脊南北 繫埔壑 幾陵谷 乾能夬 剝

斯復 千萬年 屏五□

右李曾伯復襄樊紀功銘在襄陽城西四里九宮

山亦名龜山娘娘廟道室旁摩厓同治甲戌夏屬徐星

甫大令搜拓得之後缺兩行光緒庚辰復以全本

見貽爲之暢然案宋史理宗本紀淳祐十一年十

一月丙申京湖奏聞復襄樊功都統高達以下將

士三萬二千七百人各官一轉犒緡錢三百五十

萬收復在四月奏聞賞功在十一月史据奏聞書

之也李曾伯王登史俱有傳曾伯字長孺覃懷人

後居嘉興淳祐初歷兩淮制置使權兵部尙書六

年放歸田里九年起知靜江府廣西經略安撫使
兼轉運使進徽猷閣學士京湖安撫制置使知江
陵府兼湖廣總領兼京湖屯田使進龍圖閣學士
疏言襄陽新復之地城池雖修浚田野未加闢室
廬雖草創市井未阜請蠲租三年詔從之此銘刻
於寶祐二年自稱京湖制置使是其知江陵府尙
在寶祐二年後也登字景宋德安人出制置使孟
珙幕府淳祐四年舉進士調興山主簿制置使李
曾伯經理襄陽登在行以積功升後至軍器少監
京西提點刑獄開慶元年提兵援蜀卒弘簡錄云

登在行以功陞將作監丞較宋史爲詳高達屢見於本紀淳祐十一年四月高達帶行遙郡刺史權知襄陽府管內安撫節制軍馬寶祐元年三月錄襄城功高達帶行環衛官遙郡團練使此銘刻於寶祐二年稱都統不言權知襄陽府殆以遙授之職故也首云淳祐十一年後云越三年是寶祐二年也

黔陽縣登科題名碑

高四尺四寸廣二尺二寸上截廿四行行十七字字徑七分下截一行三字篆額沅州黔陽縣登科題名九字在黔陽

沅楚地也自春秋歷漢隋唐更置不常迨我朝熙豐間
復定州立邑而黔陽屬龍標舊境山明水秀代產奇英
貞興之歲其預計偕者視鄰邑尤盛至擢進士第盧則
開先焉學宮在縣治西南隅昔以敷教扁講堂額文篆
而刻畫不楷歲久而丹青已蠹漶祐壬子予以墨綬來
與諸友講貫其閒思以明倫堂更之籌諸衆衆曰三山
林君元晉曩誕生茲邑篤敘雅好守辰陽日遠遺三大
字久欲揭而未能更之亦衆志也迺於是年冬命工鐫
刻壯改舊觀時捧鄉書赴南宮者二人而舒夢桂果奏
凱捷遂爲龍標破荒豈非學校者賢士之所關氣數旣

回盛事鼎至實肇端發祥於斯額更新之後乎或曰士
之達有時得有命於扁額之更不更無繫也然古今人
才較之何優江山旺氣發之何奇不自先不自後恰際
其逢若合符券繫云乎哉不繫云乎哉予喜而就爲立
石以題名于堂之側繼自今掇拾巍第拖青曳紫者裾
聯袂續又當大書不一書若夫鋪揚

聖朝得人之盛歸美賢侯勸駕之功刻勒三邑登科姓
字則自有郡□□□□□□甲寅郡庠雁塔在岢寶祐
甲寅登高前一日邑令東嘉薛舉巖記

舒夢桂

右薛舉巖黔陽縣登科題名篆額三行行三字在黔陽縣學明倫堂庭東壁間上截刻記文正書廿四行下截止題舒夢桂三字姓名以後空石爲元至正間人續刻詩於上玩記文語氣似以則自有郡庠鴈塔在爲一句末行以郡庠臺頭前行自有下似當空今石刻前行有下有郡字行末又有甲寅二字中間似有數字已磨去不或係當時磨改或後人所爲俱未

可知

古泉山館
金石文編

湖南通志所載迺於是年下脫一冬字東嘉誤作
永嘉通志選舉舒夢桂登進士第列於寶祐四年

文天祥榜據此碑則當是寶祐元年姚勉榜進士也林元晉知辰州通志作林元誤脫晉字盧則開熙寧間進士通志不詳其年舒夢桂後終宋之世黔陽第進士者惟向寵孫一人廿二行郡甲寅三字是改刻時未經磨去者瞿氏謂則有郡庠雁塔在為句是也下截朱守諒七言六絕係至正八年七月所題

劉用父等題名

高四尺一寸廣五尺九寸八行
行八字字徑五寸正書在餘姚

寶祐乙卯暮秋之口上冀劉用父山父龍父魯德霄白

雲山人郭仲休由錫雲回舟此憇飛瀑之下分石列坐
浮觥清流視永和暮春觴詠其致一也主此□施若訥

訪碑錄載寶祐三年白泉山施若題名蓋卽此刻
而脫一訥字或拓未顯也

宜州鐵城記

裝本高廣行字不計字徑二寸許正書篆額失拓在宜山

嶺右自淳祐以來傳雲南有韃患 朝廷重我南鄙移
師戍之今大帥寶文胡公時呂郎官轉對上前獨謂遣
戍非經久之策當如唐李德裕籌邊故事按山川道里

擇險築城以扼其阻 上雖下其議未果行也寶祐甲寅秋前事復棘 上思公言乃命經略一道公至閱履封以宜當西南夷間道必能干城者可畀虎符得武經大夫雲侯拱守之侯詣帥府受約束公曰惟事、有備無患耳昔佛狸未寇元嘉時盱眙守沈璞以郡居要衝繕城浚隍上下皆謂過計及魏兵南向所至赤地而大將臧質獨藉璞城以挫虜往事明驗可見已今震于其鄰獨不當爲徹桑計虜侯奉命惟謹至宜顧城陋不足恃則經營詎郡式里而近有山環遶皆峭壁懸厓內可容萬竈飛泉石井取汲不竭侯熟視嘆曰墜險無踰此

矣亟聞于公、以聞 廟堂得 旨以幣百萬下之郡
鳩工計材伐石畚土因山之勢聯絡而城之周遭一千
八百餘丈爲墻櫛如爲門翼如悉與山相繆山之前下
瞰龍江後倚天河四面形勝屹然堯成□鉤衝肉薄無
所施也凡州縣治寨舍糗糧器械峙積之所咸備而侯
未以民遷姑徙附邑宜山治隸焉然宜民知保生聚者
亦莫不適有居用永地于茲新城又以見侯之是役非
獨地利人和從可知矣役始於乙卯季春之望訖於仲
冬之朔指授規畫侯必躬必親其董而相之者羈從事
鍾磬文學掾林均清遠節度推官顏得遇也城成以其

砌疊皆石乃名鐵城圖上帥府寶文公命應德記之夫王公設險以守其國地不能自爲險也而設險則人力存焉重門擊柝以待暴客爲暴者不必有也而恃吾有以待之易前民用豈我厚誣今宜得侯爲保障重門設險豈特無唇齒憂彼竊伏草莽埃時觀釁者將不復作噫亦意造物設是久而有待於侯之來也亦意南方當無狄患而侯之遂築斯城也侯關表老將熟更戰守自領郡後閱丁壯治戈甲明斥埃結蕃鄰爲宜備無不周城其大可書者伐柯匪斧所以成侯之役者誰與胡公名穎字叔獻長沙人文武伯也今又被命入奏是歲

日長至奉議郎通判靜江軍府兼管內勸農事借緋黃
應德記岳麓何應文書奉議郎 特差充廣南西路經
略安撫司叅議官張埏篆蓋

宜州鐵城頌

高一丈廣六尺廿行行三十八字字徑二寸
許橫額題宜州鐵城頌五字俱正書在宜山

恭惟我

宋聖作明述上同堯舜代天子民無間遠邇肆我

皇上家視天下比以 朝紳之議論制闔之申明皆謂

韃警雲南而西廣首當其衝既 命寶文胡公爲帥復

以宜當西南夷間道 特命總管雲公出守斯土爲保

障計公至自帥府寶文公授以籌邊方略設險守國以爲經久之規公奉命惟謹始入郡觀郡城之東龍江之北四面石壁環遶且襟山帶河有關中百二形勝遂聞于寶文公轉聞于朝得旨以幣百萬建爲鐵城其成也不資屋宇之覆蓋不勞後人之葺理其堅如鐵之不可擊而破其高如天之不可階而升新舊之異殆霄壤焉外夷聞風且將褫其魄而奪之氣矣何幹腹之慮哉其保衛宜民實與天地相爲久長故四民同爲之頌刊諸鐵城石崖以紀其無窮之績云頌曰

惟天惠民惟辟奉天惟臣承辟于蕃于宣明明天子

不我遐弃 新命帥臣經略西事永惟宜陽外控西夷

居廣之衝實爲藩籬蠢爾狂韃謀幹吾腹 天子曰吁

保障誰屬迺眷 西顧疇咨虎臣帥臣迺言雲公其人

天子曰俞俾鎮斯土安邊立功外禦其侮公拜稽首

曰往欽哉徒御嘽嘽惠然肯來自公來宜奉 命悉

力熟觀地形設險守國迺經迺營因山爲城石壁回環

屹然天成雙流淼淼如帶斯遶惟石巖巖角立崖表諸

關宏修高無與儔內容萬竈外扼咽喉四面如鐵形勝

卓絕車不得馳騎不得列牢不可破險不可夷雖有賁

育勇無所施迺立府庫儲財積粟細柳分屯兵食俱足

復用石工鑿井于中山下出泉源源不窮重城外維下
瞰淵水東西對峙摩空玉壘郡邑既遷解宇森巖民居
雲集接棟連簷道更坦履其直如矢懋遷有無日中爲
市猗歟我公盡心竭忠指授規畫必親必躬賢哉長幕
暨郡文學同我倅車贊籌帷幄以衛宜民咸賴之安
堵樂業春臺熙熙虜人聞風心寒股慄屏迹而遁邊境
寧謐宜山峩峩龍水湯湯鐵城之功山高水長四民交
歡磨崖刊頌億萬斯年永戴我

宋寶祐四年三月吉日刊

右宜州鐵城頌在宜山縣案明統志鐵城在慶遠

府城北三里宋寶祐間築黃應德作記頌卽此碑也龍江在府城北石岸峭險東流經柳象潯藤梧等州至廣州入南海相傳江道如龍故名碑所謂龍江者卽其地碑云郡城之東明統志謂在府北恐未得實記文云後倚天河案唐置宜州領縣有龍水天河蓋皆以水命名也宋史理宗紀寶祐四年五月羅民鬼國遣報思播言大元兵屯大理國取道西南將大入邊詔以銀萬兩使思播結約羅鬼爲援碑所謂韃警雲南者卽其事紀書於四年五月城築於三年秋者元兵窺伺桂管宜州首當

其衝預爲設險未有攻掠之事史可不書至四年五月以羅鬼遣報乃書之非有異也記云淳祐以來傳雲南有韃患朝廷重我南鄙移師戍之案淳祐六年桂林撤戍記云淳祐乙巳聖天子以□侵大理豫戒不虞詔京湖大制閩調兵戍廣諸軍以十月二十六日抵桂林邊境肅清警報不至至次年春得旨撤戍淳祐九年犒賞庫記云皇帝嗣統二十有四年疆吏來告□將蔡雲南以剋我南鄙□馳驛召濠梁董公鎮桂州卽碑所云移師戍之也胡穎宋史有傳云湘潭人此云長沙者舉其郡

也碑云時呂郎官轉對上前不言何職傳亦但云授京秩而已其爲寶文閣學士傳亦不載碑云得武經大夫雲拱守之武經大夫元豐以後之制卽西京左藏庫使也清遠軍節度在融水張堦字叔信鄱陽人見慶元四年水月洞詩刻其龍隱岩詩後又署稱番陽銀峯張堦叔信詎郡式里而近詎乃距之誤悉與山相繆句疑有脫文或誤于翦裱時耶甲戌九月海琴自桂旋湘以頌文見詒不見撰書人名疑其失拓越月張敏吾又寄裝本記頌各一册乃知頌後不列書撰人者已見於記也記

作于三年長至頌文當亦同時所作頌刊于四年三月記文當亦同時所刻

錄用勳裔御札碑

高三尺七寸廣三尺九行行十字字徑七分
書篆額二行題皇帝御札四字在湖州府署

虞廷之賞延于世漢氏之官長子孫春秋謂成季之勳
宣孟之忠而無後為善者懼矣朕慨思

開國以來勳臣之裔有能世濟其美而不能世其祿者
仰所在州軍體訪得明具以實聞以備錄用

付三省 押 封

按咸淳臨安志此詔在寶祐四年十二月錄用勳裔

戒飭臧吏二詔下有丞相臣程元鳳等跋所謂勳臣
無後則示以錄用之寵貪風之殄則申以戒飭之嚴
又曰紹興則有佐命元勳訪用子孫之詔隆興則有
貪饕無厭抵法不赦之詔皆并二詔以立言又云特
降睿旨許令立石是二詔當時皆有刻石而今獨傳
此者必有惡其害已而去之者矣

兩浙金石志

再來石題字

高四尺二寸五分廣二尺九寸三大字字
徑尺許年月六字字徑二寸五六分正書

再來石

開慶已未夏題

右題字見年月而不見人名年月上紙不全整疑失拓也

重建逸老堂碑并陰

高四尺六寸廣三尺一寸十八行行四十字字徑七分正書閒雜行筆篆額題重建佚老堂記在鄞縣

逸老堂者紹興十四年郡守莫侯將所創并為文以記之者也其義蓋摘李太白所云四明逸老賀知章之語

按賀公字季真唐開元十三年為禮部侍郎集賢院學

士肅宗升儲副授秘書監太子賓客天寶初移疾請為

道士還鄉里詔賜剡川居焉剡隸越鄞故越封部公亦

白號四明狂客故侯締堂安靈於是邦之月湖且合太

白而紀之謂二公皆抱氣識之全者也然以予觀之太

白初見明皇倨傲鮮腆待高力士輩若奴僕其氣真可

以揮斥八極驅役羣動而其末也乃陷於永王璘之黨

毋亦氣有餘而識未足耶季真遭時遇主彈指可都顯

位忽飄然引去人知其為高而不知其所以高也於是

肅宗之人品已瞭然於季真胸中矣使與相終始則靈

武之事犯父子之大倫季真亦將不能逃萬世之責易

曰知幾其神乎季真有焉又豈止於蟻蠓富貴涕唾卿

相而已哉此之謂真識而非徒氣之所能為也是堂之

建迨今一百十五年矣屋老圯壤屢葺屢頽片瓦尺椽

幾無存者予領郡之二年始克鼎新之規模宏敞視昔

稍異因求季真之像于越繪而龕之且誄以詞述以贊

用詔永久俾邦之人士景清風而企芳躅或少裨於風

教云爾嗚呼自有天地以來上下數千百年其間據權

位擅勢利呼吸福禍顧盼榮辱以狂走盲趨一世之人

者不知其幾矣未幾聲消逝滅影響無聞甚者流腥遺

臭有孝子慈孫百世莫之能改迺若孤標勁節之士身

沒而名愈彰千載之下雖漁人樵子亦為之興起不以

時遷世換而二其心也為士者宜知所擇矣堂既成面

對涵虛館表裏及東西兩橋并繕治之輪奐丹雘皆粲

然華美要不可無以敘歲月於是乎書開慶元年秋七月癸卯朔觀文殿大學士銀青光祿大夫汾海制置大使判慶元軍府事兼管內勸農使金陵郡開國公食邑五千九百戶食實封一千七百戶吳潛記

中散大夫直秘閣致仕歷陽縣開國男食邑三百戶

賜紫金魚袋張卽之書

降朝散大夫直寶章閣祥符縣開國男食邑三百戶

賜紫金魚袋趙汝楫題

陳□刊

碑陰

畫象上方題贊十四行行十字
字字徑七分正書雜行體

山林之士去不可挽市朝之士出不知返矯矯

先生高眇遠視可仕則仕可止則止粵惟二疎輔導漢

元怍其卽位旋以飄然粵惟

先生師傅唐肅太陽未升去之已速前疎後賀夫豈不

情知幾識微以全令名狂非真狂醉非真醉詩侶酒徒

亦復爾爾四明之陽月白山空平湖萬頃今古清風

金陵吳潛贊

棧堂在府治西南又有涵虛觀舊志皆不載紹興間
守莫將建以祀季真太白開慶守吳潛更新之文意

頗有軒輊亦不可易也張卽之字温夫慶元六年以
父孝伯蔭授承務郎中散大夫直祕閣學士善翰墨
師歐陽率更晚年益超悟 右畫象上刻贊語在逸
老堂記之陰潛旣作前記復爲此贊不及太白猶是
前文意也 兩浙金石志
兩浙金石志載此碑釋紀爲祀因謂莫將建堂以
祀季真太白誤矣碑文剝泐據志補之吳潛字毅
夫柔勝子宋史有傳

吳文震元石詩

高二尺廣三尺詩八行行七字字徑二寸款一行十一
一字字徑一寸五分分書跋九行行廿四字字徑五

分行書
在道州

卷石之中有道存巖巖氣象峻于天
巍乎近取舜爲法
卓爾如羣孔在峙跨六鰲頭觀戴極
出羣龍首要承乾
聖門所重非科第向上工夫合勉旃

景西焮權郡南海吳文震題

泮宮頂羣石中有嶄然特立者舊以狀元山□之
夷泉吳先生以湘倅攝郡□學因□□怡然自得□
詩□首□唱占鰲頭世□以是爲□今 先生詩旨
以廣大高□□問孔爲□晞顏爲□嚮是□賢而
聖由□而天□□□□□□□□□平萬物之表出類拔

萃□無愧元□之元彼謂□□□生□□鄙矣昔元
刺史遊右溪遊漣泉□□詩以勸學者□□□狀
元山而詩以刻之詔承學於不朽真無愧古人□□
□郡博□徐權□□外郡營道尉攝教曾溢□□謹
跋學正□清朝直學義允之蔣寅發掌儀何元清司
部鄧□□敬登□□

右詩九行八分書用唐法跋行草書九行似坐位稿
在道州元山吳文震州志佚其名金石審

右吳文震元石詩在道州元山山在州治西半里
儒學後形家謂主州中人文亦名狀元山相近爲

虞山元次山嘗立舜廟於其地此刻湖南通志失採永志載此多闕譌茲據石本錄之直學掌儀司部諸名目他處罕見景酉景定二年辛酉也石上尙有楊某五律詩一刻恐是宋以後人

封天曹猛將敕

高一尺四寸五分廣二尺二寸十四行
行十六字字徑六分行書在蘇州府

皇帝勅曰國以民爲本民實比於干城民以食爲天食猶重於金玉是以后稷教之稼嗇周人畫之井田民命之所由生也自我

皇祖神宗列聖相承迨茲數葉朕嗣鴻基夙夜惕若邇

年以來飛蝗犯境漸食嘉禾宵旰懷憂無以爲也
黎元恣怨末如之何民不能祛吏不能捕賴爾神
力掃蕩無餘上感其恩下懷其惠爾故提舉江州
太平興國宮淮南江東西浙四制置使劉錡今特
勅封為揚威侯天曹猛將之神尔其甸□郡庶血
食一方故勅

景定四年三月八日

劉錡宋史有傳字信叔德順軍人五行志淳祐二
年五月兩淮蝗景定三年八月兩浙蝗文所謂邇
年以來飛蝗犯境也

濂溪書院額并表記碑

高九尺六寸廣五尺六寸第一截兩行行三字字徑一尺五寸中一行四字尾一行十六字次截四十六行行十九字字徑五分未截四十二行行十八字字徑五分均正書篆額題皇帝御書四字在道州

道州濂溪書院

絹熙殿書

上蓋篆璽其上有王成二字小印

濂溪書院掌

御書臣李挺祖恭摹並篆額

上截

臣允恭言正月貳拾陸日準尚書省劄拾貳月參日恭奉

宣諭指揮降下

御書道州濂溪書院額壹軸給賜本州臣卽已躬率闔

郡官僚恭詣道左迎接望

闕謝

恩祇受訖者伏以

星奎啓運洪儒傑出於瀟原

雲漢爲章

綠字煥新於黌宇

鸞迴

鳳翥魚躍鳶飛臣允恭惶懼頓首頓首臣恭惟

我宋之右文乃有臣頤之倡道接孔孟之墜緒闡圖書
之正宗睠是春陵實其鄉國田園數畝

元豐之書契尙存林壑一邱

治平之題墨猶在况道郡得名之非偶而濂溪爲保以

至今
臣曩職采芹茲叨分竹念書塾之興凡
御扁之賜獨一九江顧惟父母之邦未沐
歷幾載何

帝王之寵闕然鉅典鬱若輿情不量遠地之微臣妄覲
上天之妙筆 奏函朝上

宸翰夕頒

昭回六字之晶芒

鼓舞一方之衿佩茲蓋伏遇

皇帝陛下緝熙聖學

表章儒先襲

前朝之美謚曰元昔

舉易名之典屈

天子之尊

臨于學肇

加通祀之儀

煥乎

麗藻之文

賁此維桑之里臣祇承

犧畫如對

龍顏

結霧

霏煙永作九疑之

輝映光風霽月喜同多士以詠歸臣無任瞻

天望

聖激切屏營之至謹奉表稱

謝以

聞臣允恭惶懼惶懼頓首頓首謹言景定肆年貳月日朝
奉郎差權知道州軍州兼管內勸農營田事充管界公
邊溪峒都巡檢使借緋臣楊允恭上表

以上
中截

臣伏讀

國史

建隆三年壬戌

車駕再幸國子監

詔增葺祠宇塑先聖先儒像

上自贊孔顏又

詔立十六戟於文宣王廟門猗歟休哉此千萬世立國之本原也

開寶以後嵩嶽睢廬四書院相繼勅立蒙被

寵綏而文風日益盛矣至于

天禧間元氣胥會時則九疑之下春陵之墟有臣頤者
出不繇師傳默契道體建圖著書上以繼孔孟之絕學

下以啟伊洛之正傳然後數千百季俗儒之習異端之教功利權謀之說始不足以惑世而誣民

我朝治體之粹所以參帝王陋漢唐者實在乎此中間雖歷艱難變故之會而人心之正理固存中國之正統固常尊安也恭惟

皇帝陛下同符

藝祖

臨御以來

崇儒重道之典視

前朝為大備用能

再立人極重開庚申循環之運歲壬戌冬

御緝熙殿

親灑道州濂溪書院六大字以旌道學之源

奎畫渙頒溪山改觀蓋百

年所望而不可得者

臣不佞

思以承

天休而侈

君賜爰建傑閣以珍藏闢

臺門而摹揭勒諸琬琰貽諸

諸

億萬與天地日月同垂無

極載念舊塾規制狹陋非稱

乃拓地鳩工凡祠宇講堂齋

舍咸新之既成則集郡士

相與勉之日

國家之建書院

宸筆之表道州豈徒為觀美乎豈使之專習文詞為決
科利祿計乎蓋欲成就人才將以傳斯道而濟斯民也
士之由是路出入是門者盍亦果確用工希賢希聖庶
不負

聖天子立道作人之意景定四年七月朔朝奉郎差權
知道州軍州兼管內勸農營田事充管界沿邊溪峒都
巡檢使借緋臣楊允恭謹拜手稽首恭書

景定御書道州濂溪書院額碑在道州濂溪書院前
碑亭中篆額皇帝御書四字作二行下刻道州濂溪

書院六大字字徑尺餘正書作二行行中書緝熙殿
書四字亦正書字徑寸許字上鈐一印文曰御書之
寶其上又有壬戌二字兩圖章方寸餘六大字之後
小正書一行云濂溪書院掌御書臣李挺祖恭摹并
篆額其下一截刻知道州楊允恭謝表四十四行又
下一截刻允恭建御書閣及新祠宇記四十二行皆
小正書周元公晚以疾求知南康軍因家廬山蓮華
峯下前有溪合於湓江取營道所居濂溪以名之後
人勑書院於其地遂名濂溪書院道州書院之名亦
曰濂溪故允恭表文云念書院之興凡歷幾載何御

扁之賜獨一九江又記文云用能再立人極重開庚申循環之運者理宗以開慶二年庚申改元景定與宋太祖建隆元年太歲干支同也宋初朝臣出守列郡號權知軍州事逮後止稱知某州事無權字矣此允恭題銜又云差權知道州軍州蓋又南宋末年之制也沿邊溪崗都巡檢本武職宋制沿邊州郡卽兼此官故允恭銜稱充管界沿邊溪崗都巡檢使又云借緋者宋制連率職司節鎮支郡倅貳服色未至而應假借者服紫止曰借紫服緋止曰借緋又云兼管內勸農營田事者乃南宋紹興以後之制也唐設度

支營田使宋之營田時因兵火後民多失業官爲募人耕之量收租利初以鎮撫宣撫等使兼管營田官紹興七年更令以監司兼領見繫年要錄監司者節度以下觀察團練等使也宋以其事歸於知軍州故以知軍州兼其事又真宗天禧中詔諸路提點刑獄加勸農使南宋以後蓋亦以知州兼其事故提刑無勸農使之銜矣李挺祖江華人卽前書九疑山銘者自稱濂溪書院掌御書臣此官不經見恐卽知州所辟未必出自朝命也道州新志謂允恭長沙人景定二年以太學博士兼國子博士出知道州治狀有聞

後擢廣東提刑宋史有楊允恭傳係宋初人官武職

卒於真宗咸平二年此又一人也

古泉山館
金石文編

右濂溪書院額并表記碑在道州楊允恭嘗立小

學於元公故居教養周氏子弟趙櫛夫為之記見

濂溪志祀名宦此碑載湖南省府志闡圖書闡誤

作開艱難變故下脫之會二字傳斯道斯誤作師

濂溪志亦載此文微有錯誤

楊允恭壽祠記

高五尺九寸廣二尺六寸記二十三行行五十六字
字徑六分後四行字數不一正書篆額題判府提刑
高峯先生壽祀之
記十二字在道州

古者黨有庠術有序國有學皆以教國人至於內睦九
族崇一姓則有家塾之教焉三代之盛王宮國都以及
閭巷莫不有學人生八歲自王公以下至庶人子弟皆
入小學教之以洒掃應對進退之節禮樂射御書數之
文十有五歲始入大學教之以窮理正心脩己治人之
道或小或大猶階而升不可踰也自利祿之塗開本末
之莫究大學之教蹊轍旣差至於小學忽而不講古道
之不可復其本蓋已先失之矣扶世立教之君子安得
不重有感於斯

判府提

刑

高峯先生溍祐丙午以舍選高第典教道州

越十二年又以國子博士剖符竹於茲郡踰年政成化
洽謂道為元公闕里既請

御扁于朝因徹城西書院而鼎新之凡可教國人者規

制畢備重念 元公百世之師禮當有後一日謁濂溪

舊宅頽垣壞壁歲久弗葺且 元公之父諫議祠堂列

寘他所即語同列曰父子異席恐非所以明有敬命邑

宰錢寅翁徹而新之合諫議元 公俾祠 于正堂就立 儒

學齋於 其右 求 周氏之族 齟齬以上者得二十 餘 人選

族之長主祠提其綱專教諭之責創掌膳之負 月 給錢

糧日足 供膳俾可 口 子佩於此焉 口 養於此焉就師教

養分而職任專課程嚴而工効速曾未朞月習句讀
辨偶者皆嶄然見頭角小學之有功於作人蓋如此凡
異姓之子弟願附齋就學者亦聽焉因奏請濂溪書院
宸奎皆已聞之子 朝斯盛舉也昔我

朝 元祐盛際諸君子聚朝尊崇孔氏之後賜田百頃
置教官一員仍令本州舉有行義人充教諭孔氏子弟
入學者優與供給夫

元公倡道上接洙泗周氏之有後猶孔氏之有後顧曩
之尊崇出於朝廷其規畫也易今之舉行出於州□其

建置也難顧

高峯先生所以倦、周氏者不忘 元公也為 元公
之後者其能忘

高峯乎於是闔周之族議立祠肖像於小學昕夕敬仰
以無忘 高峯之德將與 元公祠字相為無窮祠成

□然而謂予求其顛末巽真□為一日之長實有董教

之責誼不得辭於是諭于眾曰故居之建小學非私周

氏也小學之建壽祠非相容悅也志

元公之志學

元公之學由小學門戶而造大學之闔奧庸非

高峯先生之所望乎昔

元公年十二三志趣高遠釣游溪上吟弄風月灑落光
霽之胷次已備見于此時年二十則行義名稱之有聞
三十則爲二程師矣又聞二程之受學於南安也時明
道年十五伊川年十四師友授受實千古理學之源妙
齡志尙超卓如此今來游小學者必以是立志則□望

元公之眸容目想二程之穎悟日拜

高峯之壽像斯可無愧不然匪惟二三子之憂亦龍山
多嶺之羞

先生姓楊大名允恭字謙仲長沙人道號高峯先生云
皆景定癸亥良月望日門生迪功郎道州濂溪書院山

長滕巽真記下空

門生迪功郎道州州學教授蕭□□書丹門生宣教郎

知道州營道縣錢寅翁篆蓋學生前衡州學諭充教諭

費□慶居士充郴州□縣缺約四字前□州學諭元鼎孫胡

世昌夢龍宗周從龍附齋前州學直學□之孫歐陽應

圓應成學生周利萬日清天然天祺天錫天澤復春元

春天感天應天福天益天祥天□才□龍□□□□

元隆元迪缺約八字應月應宗應喜□□□訓□□□□

閩安餘富安發應餘伯秀文慶書院齋長周正雷書院
主祠前宗學講書周不比百拜同立石

右楊允恭壽祠記在道州濂溪故里東百餘步田
畔辛未冬翟斗南大令始爲予搜得之案志載有
濂溪小學碑記楊允恭勅立小學以教周氏子
弟而不及此碑此碑乃周氏之族感允恭之德建
立生祠而滕巽真爲之記也濂溪志載有此文大
同小異要以石本爲正志本於大學之闡奧下節
去一句文義未足矣至王宮作王公或小或大或
俱作成明有敬敬作教昕夕所作晰志尙尙作尙

、則傳寫刊刻之譌也餘不悉述明有敬有字介於
明敬之中蓋脫去補入者人名皆擠寫永志官表
不載營道縣失採不獨錢寅翁也

存志觀鍾款

拓本高一尺五寸圍六尺七寸記十五行行十三四
五字不等字徑一寸題字四行行四字字徑一寸五
分俱陽文正書
在湖南石門

皇宋澧州石門縣臨澧鄉小瓊村善溪保王家谷土地
分居奉

真秘錄嗣法弟子功德主 王惟慶同妻向氏七娘男

子俊子卿新婦張氏度氏孫安國安泰安智安喜安尙

延 等謹施家財壹伯貫鑄造洪鍾一所捨人本觀燒香祝

聖壽上祈祖禰孤冤同齊利樂鄉閭肅靜物阜時康

太歲甲子景定伍年正月上元吉日本觀開山住持道

士李夢庚 謹題

勸緣存志觀住持道士兼管内道正羅 德明 施錢

丞貫足

空下

王 子卿 施錢三貫足

鑄匠蕭吳同母彭氏九娘施錢伍貫足

皇帝萬歲

重臣千秋

文武官僚

常居祿位

本存志觀鐘不知何時飛來道光五年知縣何正機
飭砌磚圍環護題曰飛來鐘其上鑄文係宋理宗景
定五年正月上元臨澧鄉小瓊村王惟慶施鑄住持
李夢庚羅德明鑄匠蕭興一一可攷製造工緻字跡
古雅閱六百餘年卧於露地不鏽苔蘚亦不侵真奇
異也舊志作層山寺款式點畫殘缺者誤石門縣續志
右存志觀鐘款在石門縣清泉寺志云存志觀在

對河東南十餘里清泉寺在縣城隍廟東唐時荆
建案鐘於何時移置殆不可攷何正機以爲飛來
當是里巷傳聞故神其說耳臨澧鄉今猶仍舊名
在縣南小瓊村善溪保王家谷無可指證保卽今
之堡字捨入本觀入字反刻似人

杜甫墓門題額

高七寸廣二尺九寸四行行二字字徑三寸許前
後各一行行六字字徑一寸五分俱正書在未陽
有唐工部杜公之墓

景定癸亥夏孟 縣令王禾立石

右杜甫墓門題額在未陽湖南通志題作杜工部

墓碑禾誤作和選舉志有王禾宜章人淳熙十四年王容榜進士疑卽其人通籍後已七十餘年矣案舊唐書杜甫傳云甫游衡山寓居耒陽啗牛肉白酒一夕而卒於耒陽元和志云宋武子嗣業自耒陽遷甫柩歸葬於偃師縣元微之撰墓志亦云子美歸葬偃師是杜墓不在耒陽也然韓昌黎題杜墳詩云今春偶客耒陽路悽慘去尋江上墓則耒陽自有杜墓矣杜工部祠堂記云子美出瞿塘下江陵登岳陽樓覽衡嶽抵耒陽適江水暴漲爲驚濤所漂僅得遺鞞因壘土築虛冢瘞之一統志

云唐工部員外郎左拾遺襄陽杜甫墓在縣北鞞洲上耒陽志云杜甫墓在縣治北二里解縉有詩云蔡倫池上霧如紙杜老祠前秋日黃爲問鞞洲江上水流傳三日到衡陽苕溪漁隱云大抵賢者所在人各引以爲重不妨耒陽自葬子美之遺鞞而嗣業所葬元稹所志乃在鞞縣首陽可不必聚辨也斯言近之矣湖南通志謂樞雖遷而冢未嘗毀理或然耳

唐興殿記并陰

斷鼓高存一尺七寸廣存一尺八寸三分十九行行存字不一字徑六分餘正書篆額橫列唐興殿記四

字在嘉定安亭鎮菩提寺

佛者西方之聖人也譚性空下漢明帝時始流及中國

而天下而為道場作衆生福地廣居大下物有新故時

有廢興雖曰由數下梁天監末始給寺額因孫軍毀下

朝至道初朱仁幹復募緣造殿下構殆將廢矣□彼佛

相裝嚴者下通所謂衆生福地者從何而至下無緣之

慈行不捨之惠振頽綱下丹刻翬飛輪奐離立金姿寶

相下智者目之而心悟愚者覩之而下夷方斯時也有

如是人下歸棲真息心成彼功德如下生切利天其在

此歟然下攝如是之速哉其經營下□於落成恐年月

之□下缺此後縣丞兼河□下缺

碑陰

十三行行約三十字字徑四分許前後大字各一行俱行書

行在尙書禮部

援平江府嘉□縣菩提寺□□僧懷楚狀右懷楚等本

寺自梁朝下缺□□□□額菩提□後因□大士道場一

方雨賜祈禱□霞剪施□延□□下上缺約素輕怕□

□□□活□□不前豈謂近□下缺被□尉約缺動輒數

百約缺時生下□久佔僧房需索百出甚□□毀堂殿

□□便於烹炮見者□□□心□□阻攔遽行吊縛狼

猥萬狀殆不勝言昨於宝祐年□被缺九越經使府□

訴得蒙趙觀文鈞判巡尉□□□傳□人□取□□□

巡尉具□追解三名□□□等决刺案牘未軋豈□配

吏約缺十將佛殿觀音堂字□□上缺約十朝廷立法

官舍僧居約缺九姦庸□滋缺七造化無私□□育物約缺

四字愬立見□□□僧□星□□利害謹列狀□□

伏□台□符兩浙轉運司嚴□永免□占□泊□事候

台旨本部除已符運司給榜禁戢外今告示僧懷楚仰

知悉准至指揮

右告示僧懷楚仰知悉

右碑斷折不見撰書人名首行已缺僅存半字幸
篆額完具得知爲唐興殿記也碑見於潛研堂目
未載碑陰訪碑錄有行在尙書禮部公據疑卽是
矣碑無年月文有昨於寶祐年語又言案牘未乾
當是景定間事宜附理宗末字多缺泐据可見者
繹之寺爲土惡所占毀壞需索僧徒不堪其擾訴
諸使府懲治刺配三人後復肆行寺僧懷楚再懇
諸部符令運司禁戢并以此示付給寺僧因以勒
石告示勒石僅見於此寺舊有治平建炎年柱礎
題字淳祐年石橋題字今皆不存

八瓊室金石補正卷一百二十終